

# Da la cultura fin tar il cumbat da la criminalitad

## Ura da dumondas dal cussegl grond

■ **anr/fa) 23 deputadas e deputads al cussegl grond han profità da l'occa-siun e fatg dumondas a la regenza. La proposta da Mathis Trepp da tractar tut questas dumondas pir durant la proxima sessiun ha il parlament refusà.** Ier ha decis il cussegl grond da betg tractar la revisiun totala da la lescha dal personal chantunal. «Sunter che noss parlament ha decis da betg discutir en chausa personal fetsch jau la dumonda da suspender questa ura da dumondas, che serva surtut al cumbat electoral, sin la sessiun da zercladur», ha ditg *Mathis Trepp* (ps, Cuira). Cun 43:47 vuschs e quatter abstenziuns da la vusch ha il cussegl grond dentant refusà questa proposta. Sco emprim è vegnida respusa la dumonda da *Vincent Augustin* (pcd, Cuira).

### Per entant nagin sustegn segir per Origen

En occasiun da la debatta da budget 2014 aveva approvà il cussegl grond mintgamai var 400 000 francs per il teater da citad da Cuira, per la Kammerphilharmonie e per Origen. Augustin ha dumandà sche las trais instituziuns culturalas possian far quint cun questas contribuziuns era per l'onn 2015 ed ils proxims onns. «Il process per il budget 2015 nun ha anc cumenzà, perquai nun èsi anc decis co ch'ins prosegua cun questas contribuziuns. La decisiun davart il budget chantunal è chausa dal cussegl grond», ha ditg cusseglier guvernativ *Martin Jäger*. I na saja anc betg decis sch'il chantun prolungheschia la cunvegna da prestaziun cun Origen era per

l'onn 2015, ha'l menziunà, «perquai che nus na savain anc betg sche quels meds finansials èn avant maun quella giada.» Vincent Augustin aveva formulà in'incumbensa «Mantegnair l'augment da 500 000 francs per l'uffizi da cultura era per l'onn 2015 ed ils proxims». Ier ha'l cumenzà a rimnar suttascripziuns. Quella incumbensa vegn il cussegl grond a tractar probablmain durant la sessiun d'avust. *Sandra Locher Benguerel* (ps, Cuira) e *Claudia Troncana* (pld, Engiadin'Ota) la vegnan a preschentar causa che Augustin nun è quella giada pli commember dal parlament grischun.

### En tschertga da soluziuns per Sagliains

*Jachen Bezzola* (pld, Sur Tasna) ha menziunà il problem da las colonnas d'autos ch'i dat mintgatant a Sagliains davant il tunnel dal Veraina: «Era sch'igl è vegnì elavurà in concept che prevesa in spazi da spetga per 150 vehichels sper l'arsenal da Lavin hai dà durant quest enviern duas fins d'emna cun extremas colonnas e cun temps da spetgar da passa quatter uras. È era la regenza da l'avis ch'il concept na haja betg sa verifitgà?» El ha dumandà tge che la regenza prevesia da far per schliar il problem a Sagliains. Cussegljer guvernativ *Mario Cavigelli* ha respundì ch'i manchian anc las experientschas cun il concept menziunà. «Ultra da quai avain nus incumbensà la Viafier retica, la polizia chantunala e l'uffizi da construcziun bassa da'ns far propostas co ch'ins pudess meglierar la situaziun dal traffic durant quels paucs dis cun

traffic extraordinari a Sagliains.» Causa las relaziuns stretgas che regnan qua vegni, sco ch'el ha ditg, era studegià da construir eventualmain ulteriurs vials lung la via d'Engiadina. «Forsa ch'ins chatta schliaziuns cur ch'i vegn realisà il sviament da Susch.»

### Dapli criminalitad en Grischun

Sco che *Leo Jeker* (pbd, Tschintg Vitgs) ha ditg passia en Grischun darar in'emna senza annunzias dad infracziuns en chasas privatas, firmas e scolas. «Quests acts criminals rendan malsegira la populaziun», ha constatà il deputà. Cussegljer guvernativ *Christian Rathgeb* ha infurmà ch'entant che la criminalitad en Svizra s'haja reducida per 7 per-tschient s'haja ella dentant augmentada en Grischun per 8 perschient: «Surtut en la Val dal Rain grischuna, lung la A13, en Mesolcina ed en Engiadin'Ota han ins constatà daplirs acts criminals.» Per cumbatter quest svilup ha la polizia chantunala intensivà surtut en quellas regiuns ed a Cuira lur patruglias e controllas. «Il meglier sa lascha la criminalitad cumbatter cun patruglias mobilas activas en tut il territori chantunal.» Enpli ha la regenza decis mardi passà d'augmentar il corp da polizists dal 2015 e dal 2016 mintgamai per tschintg ufficients: «Quels diesch polizists vegnan ad esser activs surtut en il cumbat da la criminalitad», ha ditg Rathgeb e menziunà ch'ins collavuria era cun il corp da guardias da cunfin ed en las regiuns da cunfin cun la polizia austriaca e la polizia taliana.